

Duas mustgas cun ina frida

Ils cussegliers federali Ueli Maurer ed Alain Berset s'engaschan per la refurma da taglia e la finanziaziun da l'AVS

DA MARTIN CABALAZR

■ **La refurma da taglia distgargia las interpresas ed en il medem mument vegnan messas a disposiziun duas milliardas per la finanziaziun da l'AVS. Tant il minister da finanzas Ueli Maurer sco il minister dal socialesser Alain Berset han taxà il project sco «bun cumpromiss» e recumondan in Gea en vista a la votaziun a l'urna dals 19 da matg.** Per il bainstar da la Svizra èn interpresas competitivas sin il martgà internaziunal ed in provediment da vegliadetgna garanti duas pitgas impurtantas. En tuttas duas spartas èn refurmas urgentamain necessarias. La taxaziun fiscala da las interpresas sto vegnir adattada per che la Svizra restia attractiva sco lieu d'economia che possa satisfar a las pretendens internaziunalas. L'AVS dovra urgentamain meds supplementars per pudair pagar il dumber creschent da rentas.

Il nov project tegna quint da la critica ch'è vegnida exprimida gia l'onn 2017 tar ils projects refusads dal suveran. Ins ha uss resguardà ils basegns da las citads e da las vischnancas e las grevazzas ed ils levgiaments da taglia èn pli equilibrads. La finanziaziun supplementara da l'AVS procura per ina golvaziun sociala ed ina distgargia fiscala per las interpresas.

Promover innovaziuns

Il nov sistem da taglia/impostas è pli fair, pertge en l'avegnir vegnan tut las interpresa taxadas tenor il medem sistem. Tut en tut vegnan las interpresas internaziunalas che vegnivan privilegiadas fin qua engrevgiadas in zichel dapli, entant che las ulteriuras interpresas vegnan a pagar pli pauc taglia che fin qua. Cun questa refurma sa la Svizra garantir tant posts da lavur sco entradas da taglia ed ella daventa competitiva en la concorrenza tranter las interpresas innovativas. Promovids duain vegnir tant la perscrutaziun sco il svilup.

Da quai profitescha er il lieu da savida e scienza da la Svizra. Per las acziunaras ed ils acziunaris porta la refurma da taglia in augment da la grevazza finanziaria. Tant tar la taxaziun fiscala da las dividendas sco tar la restituziun da chapital datti en l'avegnir reglas pli severas.

Golvaziun federalistica

«En il cas ch'ils privilegis da taglia per interpresas activas sin plaun internaziunal vegnissan stritgads senza cumpensaziun



Per segirar las rentas ad in dumber da seniors che vegnan adina pli vegls dovri urgentamain ina meglra finanziaziun da l'AVS. KY

vegniss la Svizra a perder si'attractivitat sco lieu economic», ha puntuà cusseglier federal *Ueli Maurer* stersas avant las medias.

Per quest motiv planiseschan plirs chantuns da sbassar las taglias sin gudogn per tut las interpresas. Damai che la confederaziun profita da chantuns economicamain attractivs vegn la cumpart dals chantuns vid las entradas da la taglia federala directa augmentada da 17,0 sin 21,2 pertschient. Ils chantuns da lur vart cumpenseschan a las citads ed a las vischnancas eventuals effects da las refurmas chantunalas.

Probabel duas milliardas pli pauc entradas

A curta vista han las mesiras fiscalas previdas in effect che las entradas annualas da taglia vegnan probabel a sa reducir per radund duas milliardas. Resguardadas en questa calculaziun èn las reduziuns da taglia previdas dals chantuns che na fan dentant betg part da questa revisiun.

A mesa ed a lunga vista vegnan las entradas dentant ad esser pli autas che tar la renunzia a la refurma proponida, sco quai ch'in studi da l'Administraziun federala da taglia ha documentà.

Duas milliardas dapli per l'AVS

Il project davart la finanziaziun da l'AVS porta a l'AVS a partir da 2020 radund duas milliardas dapli per onn. Ella procura uschia spert per las entradas supplementaras ch'èn necessarias per pudair segirar las rentas. La situaziun finanziaria da l'AVS vegn indisputaivlamain mendra e mendra. Gia oz na tanschan las entradas betg pli per cuvri las expensas. «La situaziun vegn a s'accentuar anc pli fitg ils proxims onns cu la generaziun dals 'Babyboomers' va en pensiun e damai che la populaziun vegn adina pli veglia», ha declarà il minister dal socialesser *Alain Berset*.

Consequenzas d'ina refusa

Senza stgassar ils privilegis fiscals fissan las interpresas activas sin plaun internaziunal confruntadas cun ina malsegirezza legala. La Svizra vegniss a stuair quintar cun mesiras da retorsiun da l'exteriur, mesiras che vegnissan a donnegiar nossa economia, punctuescha Maurer.

E Berset secundescha: «Senza cuntermesiras vegnissan ils problems finansials da l'AVS spert a s'engrevgiar e stuessan vegnir schliads urgentamain en il rom da la proxima refurma da l'AVS.

«In bun cumpromiss helvetic»

Tenor ils dus cussegliers federali Maurer e Berset è la refurma proponida «in bun cumpromiss helvetic» per dus problems virulents ed urgents da noss temp. Il project dubel gida a mantegnair la buna situaziun finanziaria da confederaziun, chantuns e vischnancas, el segirescha posts da lavur attractivs ed el rinforza l'AVS. Da quai profita l'entira populaziun svizra, punctueschan ils dus represchentants dal cussegl federal.

La refurma da l'AVS 21

Il cussegl federal prepara actualmain cun l'AVS 21 ina refurma integrala da l'AVS. Tenor Berset ha quella la finamira da garantir l'equiliber finanziel da l'AVS e da segirar las rentas sin il nivel actual. Sche la lescha federala davart la refurma fiscala e la finanziaziun da l'AVS vegn approvada ils 19 da matg vegnia il cussegl federal ad adattar commensuradamein il project da refurma AVS 21. Damai ch'il project che vegn en votaziun ils 19 da matg cuvra dentant mo ina part dals basegns finansials da l'AVS resta la refurma AVS 21 vivanant necessaria. Il cussegl federal ha l'intenziun da dumagnar il project AVS 21 anc quest onn tras il parlament.